

ben sie mehr / vnd solches glüen vnd außlöschten so oft gethan / biß man Calcis genug hat / solchen gerücknet / pulverisiret / vnd mit rectificirtem Spiritu Salis in arena so lang digeriret / biß der Spiritus grün genug worden ist / dann abgossen / filtrirt / vnd die vbrige Feuchtigkeit davon abstrahirt / so bleibt zurück ein hoch dunkel grünes Oleum, welches in allen Ulceribus, insonderheit in Venerischen Schäden ein kräftige Medicin ist / eusserlich gebraucht.

CAPUT XVI.

Oleum Jovis & Saturni.

Diese beyde Metallen Jupiter vnd Saturnus lassen sich auch nicht so gar gern im Spiritu Salis solviren / doch so sie gefeylet seyn / vnd der Spiritus Salis gut ist / geschicht es auch. Aber viel besser wann man die Flores dieser Metallen hat / (welche zu machen hernach sollen gelehrt werden /) thut solche in ein Köblein / vbergeust sie mit Spiritu Salis, so greiffte er sie also balden an / insonderheit / wann sie warm stehen / vnd gibt ein geele Solution, welche muß filtrirt / vnd die Feuchtigkeit davon abstrahiret werden / so bleibt ein geel vnd schwer Oleum, Eusserlich in Ulceribus putridis zu gebrauchen.